

敬

事

草

敬事草卷五目錄

偶疾揭帖

謝諭揭帖

報入直揭帖

保劉元震揭帖

辭甘鎮大捷加恩疏

辭票首輔加恩疏揭帖

再辭加恩疏

三辭加恩廕子疏

獻倭捷請御午門揭帖

救吳寶秀揭帖

御午門樓乞扈從面對揭帖

平倭請頒詔揭帖

請補閣賜閒䟽

倭平言兵不可易動揭帖

論好貨好勇好色揭帖

請禱雨揭帖

錄上萬曆十三年禱雨聖政揭帖

萬曆十三年四月五月聖政

乞大減典禮買辦揭帖

言太倉罄竭揭帖

催發吏部陞官本揭帖

乞止典禮錢糧揭帖

分別降謫官員揭帖

催點閣臣揭帖

催考選科道揭帖

又催考選科道揭帖

防虞揭帖

回防虞諭揭帖

乞罷廣西貴州稅使揭帖

回奏揭帖

敬事草卷五

柱國少傅兼太子太傅吏部尚書中極殿大學士臣沈一貫

偶病揭帖

題臣昨因感冒不能入閣辦事深慙曠職今日
早起正擬趨赴眩運復作脚膝軟怯容臣再調
理一日明當進閣不敢偷安臣不勝悚懼之至

謹具題知

二十七年四月初六日上即日奉

御批朕覽奏知卿偶感微疾本送私寓票擬卿宜
慎加調攝稍可即入輔政特諭卿知

謝諭揭帖

題今日臣因偶病妨直具揭陳情奉

御批

云

欽此該文書官史賓恭捧到臣臣謹焚香叩頭
莊誦恭領訖竊惟臣昨日病未入閣心期今日
可入不意清晨起時頭眩脚軟嘔惡欲仆又復
逡巡就寢念閣中更無同寅而臣至曠廢兩日
負罪不小敢不奏知不意 聖慈曲軫特賜溫
綸且許本送私寓票擬尤為超踰體息如臣么
麼何以堪此臣身雖在寓而心懸闕庭日乾夕

惕度刻如歲但病係痰火而時近炎夏誠恐發
作無時有難決擬若再難強容臣遵奉特諭私
寓票擬苟可扶掖決不敢怙恃寵私偷安自便
也謹陳感激微忱恭謝超常恩眷回奏以聞

四月

初六
日上

報入直揭帖

題臣昨以偶病蒙 皇上欽遣文書官捧溫旨
慰諭臣不勝感泣當已具揭恭謝想蒙賜覽昨
暮天涼臣獲一睡今日扶掖入閣謹具奏知但
臣衰病侵尋拮据莫逮兩日少懈便覺閣務叢
積人情玩弛乃知古之大臣日乾夕惕宜無暇
遑而官盛任使實不可缺 皇上一日不棄臣
臣一日不敢惜狗馬之力但閣臣員缺已久伏
望早賜增補使臣有所衡藉以同心報國又臣

區區狗馬之忠也

七四
明初

保劉元震揭帖

題今日日講官侍郎劉元震揭帖到臣告病求
去內云已經具奏臣看得日講官每日撰進講
章事關啟沃本官學問淵源裊身恭謹無管教
習庶吉士勤于訓誨入官幾三十年清白一節
今春自陳臣擬照舊供職實非有私惟因未蒙
批發本官心懷憂慮不敢寧居故有此乞伏望
皇上念其效勞有年俯留供職則講筵庶有裨
益詞林亦不乏人伏候 勅旨

四月初八日上

辭甘鎮大捷加恩疏

二臣奏為恩命踰涯措躬無地乞容辭免以安分誼事本月初十日准吏部咨該本部奉 勅

吏部甘鎮大獲全勝奇捷殊常內閣輔臣殫忠運謀勞績可嘉茲特加恩示酬元輔志臯加無太子太師進中極殿大學士廕一子與做尚寶司司丞還賞銀五十兩彩段二表裡次輔一貫加少保吏部尚書廕一子與做中書舍人還賞銀四十兩彩段二表裏各餘官如故都照新銜

給與應得誥命如勅奉行欽此臣等仰被隆恩
俯循愚分驚隨寵至慚與悚并竊惟朝廷欲行
勸功之典則不得以特賞槩無功臣子欲懷立
功之心則不得以冒功膺懋賞臣等佐理無狀
罪愆多端慮高位之疾顛憂常職之猶愧朝夕
跼蹐起處靡寧昨者賓苗蓄謀甘鎮傳警邊臣
合策驕醜就殲斬馘七百有奇招降五百餘口
漢苗憤鬯朝野歡騰此皆 廟社凝庥神祇錫
佑聖武昭于九塞皇稜暢于三垂自天降功誰

敢貪此至於奉宣威靈獎率將士或運籌幕府
或執銳戎行亦惟疆圉諸臣之力臣等優游巖
廊偶逢盛事何忠之殫何謀之運何勞可敘何
績可稱而與介冑勞臣分功受賞是大造不無
偏予而近臣先被溢私也况前年因延綏之捷
進殿加官錫綸延世至今負乘猶有餘慚乃又
叨踰何所用耻秩太崇則傾仆易恩太重則稱
塞難揣分揆恒其能湏臾自適乎伏望 皇上
俯鑒懇衷收回成命容臣等並免陞賞庶繁纓

不至於見惜而斗量稍緩于就傾矣臣等不勝
激切祈望之至奉

聖旨甘鎮奇捷殊常朕心嘉悅不已卿等運籌帷
幄匡輔贊襄勞績宜當首敘加恩示酬國家彞典
宜遵成命不允所辭吏部知道

辭票首輔加恩疏揭帖

題發下票本內有首輔趙志臯辭免加恩一本
伏念臣等叨居輔職碌碌無功仰蒙 皇上垂
念國體因甘鎮大捷並加異數臣等已經共疏
懇辭未蒙 俞允為欲各言其情故志臯有特
疏臣亦有特疏疏雖各具意出同然志臯此疏
願 皇上特賜准辭俾臣亦得隨例並免以安
止足之分不勝忻幸謹封還原本不敢預票惟

聖明亮允乾斷

四月初十日

再辭加恩疏

奏為恩重踰涯揣躬難冒再瀝悃誠俯容辭免
事伏蒙 皇上以甘鎮大捷加恩臣等臣隨首
輔志臯具疏懇辭奉 聖旨甘鎮奇捷殊常朕
心嘉悅不已卿等運籌帷幄匡輔贊襄勞績宜
當首敘加恩示酬國家彝典宜遵成命不允所
辭吏部知道欽此除銀兩表裏先該臣候旨間
文書官吏賓恭捧到臣私寓不敢固辭謹叩頭
祇領赴鴻臚寺報名廷謝外其陞轉廕誥等恩

實為踰溢萬不敢承乃微誠未獲上通而諭旨
更加溫渥豈以臣等為例辭而已乎夫恩波浩
蕩斯乃上惠人臣內揣尤甚分明首輔有懷亦
既專跡自懇矣臣亦何敢畏避煩瀆不一畢吐
乎臣久竊大位頃復代庖正思薦達同升以廣
茅茹之途引避微躬以逃鵜梁之誚而宜退且
進無功受賞冒濫之風先自臣始靜言思之實
難為顏今天下釁孽多萌災沴時作財用告匱
致礦稅之紛紜法制陵夷縱豺狼之搏噬虜憂

猶大描逆未艾疏鑿正勤採辦莫集臣方慚格
正之罔效恨調劑之無能而奈何因此一捷遽
謂帷幄有人勞績宜敘耶且以閣臣敘邊功昔
固有之但其時臣主俱榮信有勞績亦何慚之
有茲皇上獨運安攘之策邊臣交成捷伐之
勲而臣之庸庸僅持文墨事任功效與昔懸殊
何至論賞尚循曩典難為天下解矣伏望 皇
上俯鑒愚誠收回成命容臣以原官供職用免
官謗而責後圖則臣之所得已弘敢不夙夜臣

不勝惶恐待命之至

上四月十四日奉

聖旨甘鎮奏報奇捷誠邊臣戰士戮力同心朕已
鑒知陞賞俱從優敘卿為輔臣朝夕協贊殫忠運
籌加恩酬勞寔為舊典乃屢䟽陳乞情詞懇切陞
轉加銜特允辭免成卿勞謙之美其廕子恩命宜
勉祇承慎勿固辭卿宜益展謀猷弼成化理以副
眷倚至意該部知道

三辭加恩廕子疏

奏為奉職無狀冒恩增危三瀝固祈望收成命
事頃因甘鎮竒捷加恩臣等臣不勝跼蹐謹奏
為恩重踰涯揣躬難冒再瀝悃誠俯容辭免事
奉 聖旨甘鎮奏報竒捷誠邊臣戰士戮力同
心朕已鑒知陞賞俱從優敘卿為輔臣朝夕協
贊殫忠運籌加恩酬勞寔為舊典乃屢疏陳乞
情詞懇切陞轉加銜特允辭免成卿勞謙之美
其廕子恩命宜勉祇承慎勿固辭卿宜益展謀

猷弼成化理以副眷倚至意該部知道欽此溫
綸下布感涕溢零 聖心殊甚體憐而世賞猶
然濫及顧反覆思維真有難于覩受者臣亦何
敢憚于煩瀆而不披析以懇乎蓋西陲之捷仰
藉我 皇上英略如神威稜遐邇將吏效命爰
奏成功臣德不足以干羽階庭才不足以折衝
俎豆眇無籌策以奉贊襄前此兩疏已備此意
抑臣所慚猶不止此臣職在輔弼事總綱維四
方艱虞孰非臣責今西陲雖振國靈而海內實

多釁隙憂不在四夷而在中國患不在財貨而
在民心邦之杌隍有若綴旒蹶起救之每苦無
策臣方當貶秩以謝天下歛迹以避賢人又何
胞懷冒茲優渥且廕子之命 聖朝以延世之

賞厚臣下至恩也天下之民當子豈殊于臣之
子當子乃 皇上推子民之意以及臣而臣不
能奉 皇上德意以及民詩所謂我躬不閱遑
恤我後者臣今日之謂徒令賞罰失中勸懲失
次而無以為磨礪人心之具整頓綱紀之資此

臣所為聞命縮慙而大懼隕越以辱朝廷者也
伏望 皇上俯鑒微誠絕無矯飾將廕子恩命
并聽辭免庶使臣得少逭毫末之罪以為朝著
之率儻效尺寸之功再僥異時之賜臣無任戰
慄禱祈之至

四月十六日
上十八日奉

聖旨敘勞加恩國家彞典卿宜仰遵成命不允所
辭吏部知道

獻倭捷請御午門揭帖

仰惟 皇上神明踐阼二十七年文治既敷武功亦暢間有么麼竊發靡不旋踵芟夷始含螫而跳梁終駢肩而伏斧然猶一方之小醜而非絕世之梟雄力不殫于經年事不勞于再舉惟逆酋平秀吉飛揚海外嘯聚夷羣乘篡國之餘兇肆啟疆之狡計蹂躪屬國盤據釜山方弭耳以乞封忽磨牙而橫嚙朝鮮百年之社稷蕩為丘墟八道之生靈悉塗草莽而我頓兵三路轉

餉踰年雖寧鎮噤賊甘鎮賓酋其毒未有如此之甚者也恭遇皇上毅然獨斷大發六師黜道旁之煩言制幄中之勝算于是將士用命水陸交馳乘倭運之天亡暢威稜于日域馘俘無算蕩掃靡遺危國復存捷書飛奏天地為之開霽朝野為之歡騰宜遵典彛昭告成事伏望皇上俯從部請親御午門獻捷獻俘懾邊圉窺覷之釁受朝受賀慰臣民仰望之心則日月增光大啟重昏之旦乾坤忻合永延全盛之禧臣

等無任踴躍祈求之至

四月二十
一日上

救吳寶秀揭帖

二臣題臣等聞知江西南康府知府吳寶秀被逮到京諮訪輿論委有可以哀憐者雷霆之下無人申救臣等若不為言下情終難上達除李道所奏事情已有江西巡撫夏良心巡按馮應鳳各本諒蒙慈覽但念寶秀係新任官到南康纔十六日罪過必少遽爾被逮殊為可憐又其被逮之日伊妻盡出簪珥得銀不及四兩付彼盤費而即感激痛傷自縊身死遺下七十八

歲之老母八歲以下子女三人離家七千餘里
未得還鄉又無兄弟在家可依孱然書生若下
詔獄必致糜碎種種苦情又可憐也臣等竊惟
皇上聞此必加矜惻如蒙特賜貸宥實天地再
生之德若不遽宥望乞從寬處分免發鎮撫司
覓付法司擬罪或禡職為民或發配發落使其
歸收妻骸送老母幼子還鄉以活一家之命亦
昭 皇上曲全之仁應古帝王罪人不孥之意
感 聖朝不測之恩也蓋此一事關係 聖政

不小茲者五府六部定國公徐文壁等會同申
救豈其滿朝勲賢而私一寶秀實拳拳效忠于
皇上為社稷長久太平至計也臣等忝為輔臣
不能反覆懇切引 君當道而幸聞忠計尚不
表章使憂危不關于 聖心亂釁遂起于今日
容悅偷安誤國大事臣等罪戾何所逃之伏乞
皇上法天行健賤貨貴德將徐文壁及夏良心
馮應鳳等疏虛心評覽不難轉移以延生民之
喘息以固國家之命脉臣等無任祈求之至

四

二十二日
上本日奉

聖旨吳寶秀等抗旨阻撓稅課拏解來京本當打
問朕覽卿等所奏姑准所請送法司擬罪具奏諭
卿等知

御午門樓乞扈從面對揭帖

題臣忝充近輔久隔天顏幸逢臨御之辰實
切瞻依之念查得萬曆二十年寧夏獻俘上
御皇極門百官行常朝禮上少憇煖閣輔臣
進面恩致詞奏事畢上御樓萬曆三年遼東
獻俘先期上命輔臣扈從無入班駕至皇極
門輔臣前致賀詞行叩頭禮隨駕登樓今者
聖駕既免御門臣欲面恩無地積年拱極朝宗
之意鬱而不申幸逢望雲就日之期不勝踴躍

伏乞 聖慈少垂降接容臣扈從登樓于未行
禮之前得賜面對一二以昭君臣泰交之盛臣
無任懇切仰祈之至伏候 勅旨

四月二十二日
上本日奉

聖旨朕正欲召卿面見以昭君臣泰交之義但朕
連日因祈雨澤未普焦思動火不柰勞煩且獻捷
大慶又不可曠行勉力御樓以成禮覽卿所奏
具見忠愛免其扈從照常隨班行禮特諭卿知

平倭請頒詔揭帖

題今日文書官捧出禮部獻俘儀注一本除臣
已恭票上進外臣復查萬曆二十年寧夏獻俘
時曾頒詔天下咸使聞知自東倭發難已經七
載徵師發餉遠近震動夷狄盜賊莫不生心如
長昂屬夷也而屢犯遼東趕免款夷也而妄窺
宣大近稱虜王亦為西邊松首所惑而有搖動
之意楊應龍一土官耳而旋撫旋叛行兇于川
貴之間雖中土無賴少年往往有豎白旗播妖

書出不遜語者彼皆謂朝廷方急東征無暇他顧故敢如此今既蕩平似仍宜頒詔天下以昭聖武神威之盛然亦止是諭告咸知不加恩澤條款似屬宜行該部所擬未及于此臣謹擬諭帖一道上進伏候 聖明裁斷施行

四月二十
二日上

諭帖諭禮部東倭蕩平宜詔告天下着擇日具儀來行

請補閣賜間䟽

奏為曠瘵滋久衰病日深懇乞 聖明亟簡賢

碩以重政幾早賜歸休以明臣誼事臣自舊年

十月因首輔請告閣中空虛勉策病軀奉 命

入直至今已踰半載臣不敢顧惜餘生以滋退

託之罪扶左掖右辰入申出然以單力肩重任

大懼失誤屢上䟽揭請增閣臣亦既洞寫肝腸

無復餘瀝矣而未奉 明命實切憂惶何 皇

上愛惜名器之太重而顧惜神器之太輕不求

所為共理之人乎今首輔未出閣中名為二臣而實一臣又以病不肖之臣充則名為有臣而實無臣臣之軀體委漸羸乏手足痺疼耳目回惑有日異而月不同者乃若心思浸以閉塞不能轉目忽焉遺忘茫茫瞶瞶此謬誤之徵也必不可以獨任即使政體簡要率由經常猶恐有廢墜之虞況今紛至沓來支離轆轤調劑不易轉移甚難如救焚拯溺豈可後時今茲不圖又將無及伏計 皇上必不視閣臣為冗員必以

為要樞顯任難輕畀耳獨不念持之太重而反
近于輕擇之太精而反至于廢乎詞林才品久
在 聖心遲疑經年適生揣議豈惟不利于臣
抑亦非國之福雖 皇上躬斷大事無賴臣隣

顧維軒轅至聖猶置六相虞舜重華亦資五臣
多士寔寧振古如是是用披赤投丹瀆干宸聽
伏望 皇上採擇僉舉斷于淵衷早將閣臣員
缺或從廷推或出特簡以資輔理以孚泰交尤
乞憫臣哀願留之無益恩放還山俾釋重負實

聖皇始終曲全至仁也臣不勝悚息祈懇之至

四月二十
七日上

倭平言兵不可易動揭帖

題昨日 皇上以倭賊既平頒詔天下滿朝臣
子欣欣然謂睿筭神謨警服四荒之遠洪福景
運昭垂萬禩之長莫不舉手加額而相慶相勗
盖因今日之功而思前日之所以成此者不易
又思後日之所以繼此尤不易也是役也關首
雖黠不過一人奴也群醜雖繁不能當我一大
郡也螯僅中於一隅師遂勤於七省數百萬之
裹糧六七年之奔命豈惟大小臣工竭智畢力

即 皇上旰食宵衣亦不能一日康豫夫以國
家全盛聖主獨斷而成功猶若斯之難也盖用
兵之事資費浩大徵發艱難虛內事外本非長
計而又勝敗之數最難預期反掌之間風雲變
色東功之成天幸不至之絕耳痛定知痛至今
思之不能不為慄慄有如水火焚溺可復蹈哉
故古稱制治于未亂保邦于未危從天下之未
亂未危而圖之一善言即可以結民心一善政
即可以弭民患為力易而取效大也至于已亂

已危而圖之即集衆思而未必濟事持衆善而未必釋憂稍失筭于秋毫即貽禍于罔極衽席之間瀚海再波節屋之下夷酋接踵憂勞不得不萃于聖躬財力不得不耗於中外成敗勝負之數又不得不聽於不可知之天命縱爾善收亦已疲瘁萬一蹉跌悔何可追故舉朝之忠計咸謂國家之武功雖可觀而文治實多闕如礦稅擾民太甚閭閻民不聊生盜賊日夜窺伺而有竊發之虞守臣竭力補苴而有難支之

勢孔子有言有國家者不患寡而患不均不患
貧而患不安憂不在顓臾而在蕭牆之內臣每
誦斯言輒為震惕自古蕩析播遷之禍皆始于
上下不均民心好亂可不畏哉伏望 皇上居
高聽卑思患預防勿任一己之情而拂百姓之
欲勿貪沾沾之利而輕丕丕之基勿謂小民易
虐而刑法可箝勿謂盜賊易誅而甲兵足恃
聖心抑慎 聖斷清明常欽欽如倭患未平之
時而不少怠荒庶幾上下交利臣主俱榮盛德

成功傳之萬世社稷幸甚臣愚幸甚

閏四月初九日

論好勇好貨好色揭帖

題臣惟昔人有食芹而美者思以獻其君所懷
雖淺意則忠矣臣今亦有一得輒以奉獻惟

皇上垂採焉臣看詳詞臣所進 皇長子講章

係孟子梁惠王下篇內齊宣王自言其好勇好
貨好色而恐不能行王道孟子歷為解之言三
者皆無妨于王道若好勇而好一人之敵此匹
夫小勇不可好也一怒而安天下之民如文王
之遏密武王之勝殷則為大勇即王道矣好貨

而與百姓同之如公劉好貨而使其民居者有
積倉行者有裹糧即王道矣好色而與百姓同
之如太王愛厥妃而使其民內無怨女外無曠
夫即王道矣蓋三事皆人情之所有而不能無
者惟推此心以及于民而使之各遂其情即天
理也王道也王道豈遠于人情哉臣觀此意大
有裨于今日輒敢引以為喻自平秀吉為亂
朝廷封以王爵而諭之釋兵亦猶湯之於葛文
王之於昆夷以大字小王道也而倭乃負固不

服自絕于天於是 皇上赫然震怒一意征勦
爰整師旅以存朝鮮以慰中國非所謂一怒而
安天下之民者耶如此大勇民惟恐 皇上之
不好勇也王道也若撫劒疾視而謂人莫敢我
當不論義理但任血氣乃匹夫小勇非王道矣
煌煌東功孟子不得見于當時而臣見之于今
日臣不勝慶幸以為 聖明頌乃若好貨好色
二事則臣頗有所疑自礦稅之令一出而天下
皆疑 皇上為好貨臣竊謂 皇上甚節儉必

高
三
卷五
不好貨所以留意于積儲者備緩急之需耳第
公劉推好貨之心以及民于是弛征勸農通商
惠工其所以為民者無不至能致民有積倉累
糧之富而遂其建邦啟土之圖故曰王者以民
為天民以食為天知天之天者王業可成民之
不可不富如此今以礦稅為己私而使民生怨
詛之心起反側之虞則與公劉之心甚異而去
王道甚遠 皇上何不推此心以及于百姓而
使百姓均遂其好貨之願乎豈有百姓饒餘而

入主不足者哉又如 皇長子年已十八而選
婚之使未出天下又以為疑夫舊冬節奉 聖
諭皇長子齡已過期體已充足爾禮部便具選
婚舊儀來看欽此 皇上慎重於數年而特舉
于一旦不由廷臣之固請而出于 聖心之獨
裁孰不仰 皇上啟佑之深慈謂嘉禮即可觀
也今八府淑女報齊久矣而猶未遣官刷選不
知舊年之特諭者何心而今年之需遲者又何
心夫以太王之聖而猶愛其妃是知伉儷之好

入同此情雖聖賢亦然惟太王推已及人而使
無怨曠故王業從此而開 皇上至親 元子
而尚不免于愆期不幾于所厚者薄乎 諸王
子女婚姻莫不以時 俞允而獨斬于親胤之
子不幾于所薄者厚乎安得不使人疑也易首
咸恒詩首闕睢桃夭麟趾王化所關周基八百
實始閨門 皇上以此為念即王道矣夫削平
倭奴永清瀚海樹威異域之外至難也 皇上
不惜夙夜憂勤費財百萬而猶為之奠安民生

使無反側之憂 詔行嘉禮使無怨曠之感不
過一 明旨耳至易也而顧久不為蓋 皇上
急倭患之震隣而輾轉于思故處置適當而收
成功不急二事而有輕視之心故惟意所出置
人言于罔聞夫人主不可一日不使天下歡戴
使天下歡戴此天之福也臣願 皇上於天下
事皆如征倭一事力行王道以收聖神之名使
萬方黎獻舉皆傳誦四夷盜賊莫敢生心豈非
帝王之大業敢乞 宸慈早將冠婚大禮及礦

前
統二事俯從所司奏請處分天下幸甚愚臣幸

甚
一閏四月十
日上

請禱雨揭帖

題竊見春夏以來亢旱連月每見雲合輒起大
風間得微雨無救枯槁來年絕收成之望黍苳
鮮發生之期自京師以至遼東山東河南山西
陝西皆稱不雨米價日貴民心惶惶仰惟 皇
上夙夜焦勞宮中密禱臣等大小衆職不能黽
勉調燮消災迎和深切悚懼前禮部題奉欽依
行順天府官祈禱既未昭格宜加申命合無勅
下禮部令其再行虔誠致禱以徼天佑以慰人

心謹擬傳帖一道進覽伏乞 聖裁施行

諭禮部去冬至今亢旱為災已歷三時河井乾竭
二麥枯槁民無所賴朕日夜焦思動火深維失
德致此你部裏便具儀遣官祭告 天地社稷
山川并應祀神廟竭誠祈禱內外大小臣工着
令痛加修省各勤職業以回天意毋得徒飾虛

文

上閏四月十一日
論

錄上萬曆十三年禱雨聖政揭帖

題頃者六氣失調三時亢旱仰塵聖心焦勞
深宮虔禱并勅文武大小臣工痛加修省以消
天災臣待罪輔弼五年于茲燮理陰陽實惟典
責災旱若此咎將誰歸因追思萬曆十三年四
月禱雨未應皇上親霈德音親御布素自武
英殿徒步出大明門祇叩郊壇虔申祭禱又
召輔臣九卿諭以天下有司貪賊害民致干天
和令該部慎加選用德音懃惻朝野歡呼三輔

臣亦各引罪自責交相儆戒是時臣備員講幄
記注起居竊窺 皇上於諸臣藹然如家人
皇上於小民肫然如赤子也撫今思昔如在目
前臣因恭閱紀載即此匝月之內 聖政極多
不獨躬禱一事如親享 太廟詰責太常卿沈
人种轉身輕慢復用為福建巡撫如念刑獄冤
濫去熱審尚遠即諭刑部輕罪減等重囚情可
矜疑者虛心鞠審如念燒造磁器屏風燭臺及
大龍缸糜費難成即並行停止如念天下災傷

地方錢糧出辦艱難即傳旨蠲免一年并免先
年災傷地方帶徵錢糧如念戶部婚禮錢糧難
辦即減三分之一至于並建衆輔召見煖閣君
臣唯諾宛若唐虞美政多端史不勝紀匝月如
此餘月可知輔臣申時行許國王錫爵王家屏
並以當代名賢濟濟在閣此謀彼斷協力贊襄
智慮周詳精神暇豫知無不言言無不行故上
下泰交共成盛治至今海內思歌謳吟使皇
上循此不已堯舜何以過之邇年以來端居靜

攝朝講希御勵精軫恤之念不無少遜于前而
首輔趙志臯又抱病經年給假未出臣以哀庸
之才一身獨任智慮不逮于前人精神每眩于
多事倉皇救過然且不暇其於聖政闕失安
能從容調護以時裨補致使盛美漸隳瑕疵累
見試檢比來所行復有曩時一二乎曩親禱
郊壇親享太廟今對越久虛庭燎無光矣曩
詰責沈人种猶加器使今遷謫不還即考選科
道之命亦不下矣曩慮刑獄冤濫今守令無辜

被逮縉紳滿囹圄矣曩停止燒造今開採之使
布滿天下矣曩蠲及帶徵錢糧今皇店稅課朕
民骨髓矣曩戒剥害小民今無藉棍徒假官橫
噬莫可誰何矣曩傳免婚禮錢糧三分之一今
冠婚冊立等錢糧多至鉅萬需求日急矣曩四
輔並列召對煖閣今閣臣寥寥晉接無期矣試
舉今昔之政虛心並觀豈不天淵懸隔若兩人
之所為者前海宇寧謐今安得不騷動前百姓
謳歌今安得不怨咨不見其形願察其影即今

楊應龍以小醜敢為跳梁臨清負販窮民敢與
中使作仇湖口儀真上新河等處所在為梗人
情騷動可知也中外諸臣懷忠極言者不知其
幾詞意迫切有非人臣所忍聞賈生痛哭流涕
長太息之談不至於此即諸臣之惋惻而天下
怨咨可知也靡不有初鮮克有終開元天寶可
為炯鑒 皇上何忍以三五盛治而任其日頽
日弛乎臣上累新政下愧舊臣災沴頻仍救禳
無術躑躅徬徨徒有涕淚偶因禱雨省愆愴然

追感謹將萬曆十三年四五月 聖政摘舉

畧節以干睿覽 皇上即不遠師帝王近法列

祖第以所嘗躬行者反覆思維恍然省悟如寐
斯覺如醉斯醒紹續前美蕩滌後瑕則勵 聖

德於廢闕之餘德愈光宣 皇仁於壅關之後

仁愈溥騷動復為寧謐怨咨轉為謳歌人心不
搖天災可挽百祥並集萬福攸同 皇上直與

古帝王齊名而臣亦藉以少逭戾愆不至為前
諸臣罪人矣臣無任激切仰望之至謹具奏聞

萬曆十三年四月五月 聖政

萬曆十三年四月朔 上親享 太廟諭內閣
今日朕行禮時見太常寺卿沈人种於賜福胙
并贊回宮不行退遜輒便轉身是為輕慢着回
將話來先是吏部推福建巡撫都御史以人种
及光祿寺卿嚴大紀名上御筆已點人种而是
日人种失儀詰責奪俸留部䟽三日不發遣文
書官李恩到閣傳旨欲用其次閣臣申時行等
附奏云人才各有短長人种任外官二十餘年

未嘗親朝廷之禮密邇天顏矜持太過故有差錯若為巡撫綽然有餘已蒙欽點宜仍用之以昭器使之公有頃文書房傳旨云先生每既這等說使用他罷部䟽仍批紅發行

三日 上視朝

五日以祈雨祭告 天地 社稷山川等壇

六日 上視朝

七日大學士申時行等題查得節年事例立夏以後令法司及錦衣衛審錄罪囚謂之熟審目

今亢旱傷農正宜理枉申冤拔幽宣鬱無使愁
苦之氣上千陰陽之和如先時舉行亦弭災一
事也 上從之即諭刑部兩法司并錦衣衛見
監罪囚笞罪無干証的放了徒流以下通減二
等發落重囚情可矜疑着虛心鞠審并枷號的
都寫來看

十一日諭內閣茲者三祈雨澤天未霑施朕心
甚憂懼朕步行親詣南郊祭禱卿等傳示禮部
查例來行

十二日發下御史鄧鍊條陳本文書官劉成口傳聖旨燒造磁器內有屏風燭臺碁盤花瓶已燒成的揀好的進不堪的變賣未燒的停止應該供用的照舊燒進大學士申時行等題臣等接得江西巡按揭帖備稱燒造繁難如屏風等項費過錢糧甚多竟無堪進者茲蒙採納御史之言特有停減之命視民如傷從諫如流真可媲美 二祖超越百代臣等又聞燒造數內有新降式樣大龍缸一項亦屬難成尤為糜費如

并將此項停罷則民間之苦俱為蠲除而聖仁
普被和氣可回䟽入 上欣然從之

十四日 上御文華殿講讀

十五日 上致齋於武英殿以輔臣從詣 郊
壇布服未備特賜上用布疋申時行青藍各二
疋許國王家屏青藍各一疋

十六日 上以詣 南郊禱雨預告于奉先殿
及 聖母前仍致齋於武英殿

十七日昧爽 上親御布素自武英殿至皇極

門御煖閣三輔臣侍太常寺請詣郊壇致祭

上徒步出大明門百官皆前導上數目輔臣

使近前至南郊次昭亨門賜輔臣九卿茶恭詣

壇位祈禱如儀禱畢出御幄次召輔臣九卿諭

曰天時亢旱雖由朕之不德亦因天下有司官

員貪賦壞法剥害小民不肯愛養百姓以致上

干天和今後還着該部慎加選用都察院行文

與他每知道務令着實奉行毋事虛文將還近

侍請進法駕上遽麾却復步至皇極門御座

時行等叩頭 上復詣奉先殿謁 聖母告至
是行也往返殆二十里羣下慮勞聖躬而 上
親舉玉趾無難色憂憫惻怛形于辭色者備至
百官萬民無不手額歡頌焉

十八日文書官李恩傳旨天下災傷地方着蠲
免錢糧一年大學士申時行等題見年災傷地
方幸沾恩澤而先年災傷地方尚貽困累則帶
徵錢糧是也盖往歲撫按官報災該部以錢糧
蠲之則損額徵之則不堪故權擬暫停而帶徵

於豐歲然連年災傷帶徵愈多愈不能辦雖遇
豐年民窮如故臣等以為帶徵錢糧一節亦當
議處以蘇民困 上從之即諭戶部天時亢旱
屢禱未應朕思民為邦本今小民困苦各災傷
地方錢糧出辦艱難殊可憐憫朕心惻然便查
各撫按官奏到災傷重大去處覆勘明實准蠲
免本年分錢糧其先年拖欠帶徵完者酌量具
奏定奪以副朕軫恤民窮至意

二十三日

上視朝

二十五日 上御文華殿講讀

二十六日 發下尚寶司少卿羊可立乞罷黜
以息爭端本內有姦黨語大學士申時行等欲
將此本下六科問可立姦黨是誰次日奉 聖

諭朕昨日覽卿等所奏欲使羊可立明說姦黨
是誰但人急便胡攀亂指使彼胡發一言於國
體何朕今發一札子今後諫言之臣要存國家
大體不可逞己之私意致起紛爭淆亂國事諭
卿等知之時行等題茲奉 聖諭仰見 皇上

洞照羣情既以杜妄指者之口顧惜國體又以安危疑者之心聖見高出尋常萬萬非臣等淺陋所及所有 聖諭一道謹尊藏閣中以彰皇上至公至明之美政

五月九日發下戶部戶科請停買婚禮金兩等項各一本文書官李浚傳旨准減免二分還買八分大學士申時行等言 皇上以婚禮之資有所費用乃因親廣愛之至情復以部科之言計為量減尤納諫受言之盛德臣等叅詳部科

兩疏一則謂舊例本無而頓增不貲之費恐經
用益虧一則謂召買已多又加以非時之索恐
買辦不給一則謂買辦銀二十萬每年已如數
添進不可復加一則謂蠲免錢糧百餘萬見今
無處抵補難以別指惓惓勸 皇上惜財愛民
詞極剴切望 皇上俯賜允行或大為減免以
修應天之實 上使中官傳諭云先生每既這
等說准減三分之一

十九日 上視朝畢退御煖閣召輔臣時行等

至前手授陝西巡按御史董子行本商量政務

閏四月十七日
上

乞大減典禮買辦揭帖

題昨該戶部送到揭帖為庫貯萬分匱竭懇乞
聖恩寬假以軫時艱事內稱恭奉 嚴旨召商
督辦典禮急用錢糧查得太倉銀庫僅存銀七
萬七千餘兩因商人繞泣儘作商價猶未敷數
此外並無存積臣讀至此不勝駭愕臣向聞太
倉匱乏每懷憂慮而不謂其罄盡一至于此萬
一國家有不備不虞之事動作須錢何以應之
將無錯愕倉皇而束手待斃乎此真寒心慄股

天下最大之憂蓋總計國家正賦每年不及四百萬而各邊年例常過于四百萬該部歲歲拮据不勝勞苦乃今皇上所取大典金寶玉料珠香等物計算買辦當二千四百餘萬其數五倍于正賦非有神輸鬼運豈能給此縱將每年正賦盡充此供亦當總六年之輸方始能敷正賦自有正用固無可省之理況以一理之費至二千四百萬自古所無譬猶挾山超海苦人以難而終不能副徒為天下所駭耳蓋皇上方

且慎重典禮而偶未筭及錢糧不覺允所司之
派如此諒非 聖意臣下安可不言今邊餉解
官號呼以求而未能給發然萬不可稽以召士
卒脫巾之變東征將士尚有送供與撤回之費
方煩處給至于西播用兵四方災傷且置之度
外而未暇遑及矣尚書楊俊民日夜焦迫憂悶
致死則計臣牽補之難實為可憐而軍國關係
之重尤宜軫念也臣聞在廷之言皆謂 皇上
大婚止用十七萬豈有皇子典禮而可加于

皇上乎于禮為不順以前惟東征之費最大鋪
宮之費又最大今此傳辦尤為極大決難措手
于時又不堪若論戶部職掌當急軍國之需以
防亂釁仍須稍加積蓄以備不虞今帑藏既虛
而有此傳奉該部自合披誠奏請以祈減免
皇上至聖至明豈不念典禮關係觀瞻固不可
缺而軍需關係安危尤不可缺緩急先後輕重
多寡 聖心必有酌裁何得隱忍不言而直至
罄盡如掃然後言乎此臣所以震悸不寧懼無

以為國也伏望 皇上俯加照察惟懷永圖詰責該部何不早言以裕國計仍督今後務湏日夜講求毋復怠緩尤望 皇上裁酌典禮之中寧儉無奢將前項傳辦大加減省以立子孫萬世常行之法使該部可以遵奉辦進不致妨悞大典違拂 聖心國計幸甚臣等幸甚

上十九日奉

聖旨朕覽奏具悉忠愛懇切已知道了

言太倉罄竭揭帖

題臣此月之內所上奏䟽揭帖至萬有餘言自知冒煩莫此為甚祇緣心切憂惶不覺諄復不然豈敢妄瀆至尊為哉昨日發下山西撫按乞救異常旱荒二本此 皇上垂憐窮邊危民而欲推至仁以弘濟之上惠也除臣恭票上外臣連日有聞正欲入告蓋臣近因戶部言典禮錢糧難措太倉所積罄盡為此驚心多方訪問則有惴惴其慄不獨為典禮未備憂而且為軍國

大事憂立不安坐不寧恐變起邊陲事在眉睫
今雖亟處尚患不給者矣戶部題各鎮年例銀
兩奉 旨准發即時起行例也訪得近日雖奉
明旨悉皆空文無實解官守候一月至今尚未
得行此類不止一處邊方軍士何所仰以度晨
夕活妻子哉又訪得各鎮軍士缺糧有自去年
秋冬至今未給者其為引領又當何如薊鎮管
糧郎中於一月前被彼處軍兵圍計錢糧該郎
中窘迫開庫與看盡其所有而散與之每軍止

分得銀五厘幸而各軍素能體諒郎中亦善委
曲謂戶部早晚發來僅免于亂今尚未發此輩
非孝子順孫必致鼓譟終當作何究竟作何收
拾已上事情甚的而該管官乃上畏 聖明之
督責緘口不言下圖苟且以儻來望各處解到
而遠水不救近火近開援納事例一月之內又
且掃迹無應目下給發已該一百萬兩日過一
日益又增多而山西又來求賑當以何物應之
即有題覆不過是紙上哀憐而已巧婦不能為

無米之炊非天雨錢粟必無幸矣查得太倉止
有老庫銀二百萬從來不許輕動今豈可動乎
即欲動之目下便當發一百萬餘能支幾時乎
欲借之兵工二部二部自有急費且無多儲欲
借之各省直各省直歲額尚稽何言額外事關
安危時又緊急誠宜特煩 聖心勿以此事作
等閒勿以臣言為過慮細加思繹早賜籌處以
定國家呼吸之傾危臣不勝瞻睇之至

閏四月
二十五

上日

催發吏部陞官本揭帖

題臣昨接得吏部揭帖南北大僚卿寺曹省以至藩臬各官未蒙點發者多甚非所以重天工而勤庶績也我國家官制乃太祖高皇帝

深鑒前代濫員之弊親加斟酌至于晚年而始定星布碁置各有司存或總其綱或分其緒每設一官必有一事原無剩餘冗冒之可缺也況今中外多故而藉以竭蹶彌縫者比往時為更急如帑藏匱乏戶部尚書最急大典在邇禮部

尚書景急吏兵二部樞轄文武豈可久缺侍郎
至如南京吏部尚書乃百僚之長而虛矣南京
兵部又叅機務彈壓根本者而堂上無一人矣
南京總督倉場侍郎錢穀重任也而亦虛矣巡
撫係一方總轄而鄖陽之缺又虛矣雖寺省之
分猷司府之宣化何一官之可缺何一日之可
缺缺則必有受其弊者蓋事有定曹則精人有
專委則舊衆人同謀一事雖愚必明一人獨謀
衆事雖智必愚一人止作一事則閑習而多得

一人兼作兩事則倉遽而多失本非職掌而輒
時署管已既有代斲血指之羞人亦有五日京
兆之玩其積弊已多者必將諉罪于前人而釀
釁方始者又將留禍于後人以故千瘡百孔左
支右吾苟且目前而無終歲之計豈但官非其
人人非其官亦為官不即工工不信度惰窳玩
愒積漸然也若正推不可則陪推可用若原推
不可則後推可用若見推盡不可則再命之推
必有可用推舉在下簡用惟上凡此一代人才

孰不感知思報何為久稽登庸阻天下效忠之路也臣備員糜餼空度歲時身既妨賢鮮同升之儔而又坐令吏治不振官常不修明作之氣哀鹵莽之風熾大臣委之而小臣竊之士人委之而吏人竊之生殺之柄皆歸奸頑予奪之權盡制豪猾夷狄盜賊輕朝廷之無人政利國虛臣罪滋甚不勝憂惻不勝憤懣伏望將吏部前後推補總䟽速賜點發庶百職皆得其序而德意有所導揚也臣無任鵠立待命之至

乞止典禮錢糧揭帖

題茲蒙發下戶部計處財賦本章令臣擬票除
臣恭擬上進外臣看得財賦一事不惟戶部甚
難設處即臣亦甚難擬票深恐所擬未合 聖
心顧反覆思維別無善策 祖宗以來止積得
老庫二百萬其難可知每歲天下進京止四百
萬而出亦如之本無贏餘也而連年用兵及舖
宮等費乃至加用六百八十餘萬則楊尚書盡
力搜求于四方而本官亦因之以斃其不可復

繼又可知矣今欲一旦責成代署之人豈能神
運鬼輸乎擬 旨責成亦虛文耳豈惟虛文恐
有實禍何則邊軍乏餉已久而濟之之策窮也
夫典禮至大給商誠急但以軍情而論則濟邊
尤急邊軍窮苦止靠月糧糧久不與變在目前
一行鼓噪中外動搖此事關係宗社安危安得
不凜凜危懼即使觸雷霆犯譴責猶不至于
壞軍國之大事被不赦之惡名也此固人臣之
所能權亮輕重緩急而自為計者故疏中之辭

止有哀懇該部既不能奉行設處矣則不若霈
發德音慨賜停止亦可以收盛德之名而使
天下萬世傳誦無窮不然以必不可能之事而
責之以必能彼既難副此亦徒勞若夫各處可
催可括之錢已擬嚴旨催其徵解不敢少為
寬縱也臣觀東事告成皇上之福甚大從此
海內清平休養生息再更數年該部儲節必多
以次進供源源有日下不勞上不匱且不至以
空乏貧苦之形傳播夷夏使其窺知國家虛

實此籌財之上策若舍此而求奇皆反裘負薪
竭澤求魚財聚民散之事臣不敢也

五月初九日上

分別降謫官員揭帖

題近日點發吏部催補京堂之疏一時增四尚書二侍郎一巡撫舉朝歡暢謂聖心轉移泰和在即矣惟是庶僚多缺則中外尚傾耳而聽銓曹猶束手無措也昨者亦曾總催未蒙併發豈謂其中有降謫官員可疑者在乎夫降有不
同有因觸忤威嚴為欽降者有因科道糾察為例降者欽降者陞遷不可朦朧而該部若擅為混推罪也例降者原題不過懲創而該

部若抑遏不推亦罪也此兩者當有分別難以
槩視槩視則偶挂彈章者永無湔洗之期而科
道之權上與至尊等是天地有棄物聖人有
棄人不惟非曲成弘覆之仁抑亦非舍短取長
之道人才實難安得盡無纖疵薄議者而用之
乎臣查得今次總催元無欽降在內即有一
二人亦係例降非欽降也伏乞俯垂亮察
早賜點允臣無任祈望之至謹題請旨

五
月
十
上

催點閣臣揭帖

題自首輔臣志臯給假以來臣以一身直閣九月于茲綿力靡勝罔知攸措頃緣首輔十五疏乞歸 溫旨勉留諭以國家多事內外艱難正賴同寅協恭贊襄不逮仍諭吏部閣輔久缺便着會推在任在籍堪任及前推員數開具來用臣莊誦再三不勝喜躍以為 皇上留神輔弼原欲備官特因慎選而尚懷恭默今歷時既久必為通時矣疇咨既深必得賢雋矣日夜望

新命之下而又復杳然若歲大旱雲方合而忽散若濟巨川舟徒橫而不來不惟無以慰首輔之心臣亦何以為情也首輔尚病皇上以六曹幾務總之于閣而寄之于臣臣不盡心則臣之罪但臣能盡心而不能強其才之所不能又不能保其身之必無病今國家多事內外艱難誠如聖諭夫曰多事則千瘡百孔繭絲牛毛豈一身耳目所能周曰艱難則纍孽萌生蝟起蟻踊豈一手足所能支語曰一手獨拍雖疾無

聲一心獨運雖哲不明故尊賢使能俊傑在位
又國家閒暇之時而明其政刑此治天下之常
也雖有賢能置之優閒而不用雖有政刑束之
高閣而不舉以此治閒暇之國家尚不可而况
以此治多事艱難之國家乎又况臣以衰殘之
年獨入獨出目不給視手不給披心不給慮紕
政日行而臣不能挽亂徵日見而臣不能弭痰
火中攻屢至眩瞶筋力外竭兀欲顛仆若不付
托名賢使之整理廢弛日久雖有善者莫能如

何矣 皇上業知政本之重而徒屬之一病臣
是 皇上以臣為孤注而以天下戲也臣業知
已之不能而徒防賢路是臣以身為孤注而以
皇上之天下戲也天下後世其謂之何望將吏
部會推總䟽速賜點用數員俾其協力贊襄以
紓 皇上之焦勞以成首輔之忠愛使臣得退
歸田里以終餘年

五月二十
五日上

催考選科道揭帖

題該吏部都察院及科道等官屢催考選行取
官員投揭到閣臣反覆看詳大約謂臺省空虛
憲法廢墜代庖者不便於彈壓無攝者多至於
曠鰥不啻詳矣臣又何言然臣又思之臺省之
官非他官比其朝夕論列則皇上之耳目也
其中外巡察則皇上之紀綱也耳目廢則上
孤而國危紀綱廢則下玩而國亦危此誠不可
久缺者故祖宗舊制六科給事中多至五十

餘員十三道御史多至一百餘員遇缺輒選初
無定期而 皇上往年嘗命一年一選誠急之
也今南北差遣委實不敷而行取到京者乃博
采於四五百人之中勤咨於四五年之內又
上請者不知其數而後得取可謂擇之又擇難
而又難矣待選已久奉 旨無期 聖意淵深
衆所未解臣愚伏思往時一年一選登進頗易
不無狂躁之士濫于其間溷淆正論是誠傷于
太數乃至連年不選登進過難屢經黜陟之後

零落已盡宣達無人貞肅罔藉是則傷于太踈
今此一時所謂勢窮理極不可復緩矣中外見
明旨不下則無端揣摩以為皇上不無憾于
舊臣因曲防乎新進故是役也遲留沮抑以預
折其喜事之心夫具曰予聖詩人良規予言莫
違孔子深戒臣想聖意必不其然何則臺省
之職豈惟欲其叩墀排閭光補衮闕抑又待其
發奸摘伏糾正官邪彼百司庶府藏慝何止萬
端四海九州隱憂豈但千計而惟科道官布列

中外此不言則彼言繼續後先甲失之則乙得
故能震聳奸回支持宇宙輔立良善纏綿邦家
是故大小臣工孰不妨其多口如臣塵忝亦難
保其不言然惟畏其有言故猶幸而無罪是固
儆戒相成之地也夫毒藥所以攻病苦于口而
益于身忠言所以觸邪逆于情而利于政故以
天下官吏言無不欲科道少而以天下軍民言
無不欲科道多正為閭閻之奸弊吏不能譏察
者惟科道能譏察田野之抑鬱民不能上聞者

惟科道能上聞故吏有所憚而不敢為則其害
除民有所藉而得為則其利興科道之有裨于
國家而不可缺明矣況今次行取皆歷久練達
之才而一時部院諸臣又無不欲仰體 聖心
精求細擇者乎伏乞 俯賜俞旨及時登用第
令恪遵 明命遴選老成端正體國奉公之士
毋收喜事沽名結黨行私之徒考選既定仍一
一開具履歷考語以待 聖明親點則顯陟出
于 九重私交絕于羣下虛浮者無所冒進忠

盡者必不見遺 皇上既待諸臣以腹心諸臣

必願為 皇上耳目庶幾紀綱有維忠益得廣

而襄天工成至治端在茲矣

五月二十七日

又催考選科道揭帖

題臣竊惟近日第一緊要政務莫急于考選科道今行取諸臣鱗集待命久矣臣下屢以為請非敢為瀆誠有萬不得已者蓋祖宗設立科道之意初非取其備員亦非不知聒擾之可厭也深維天下之釁虞當防而國家之神氣宜振凡朝政有得失邊情有緩急官吏有賢否閭閻有苦樂上不能親以德意達之于下下不能親以艱難聞之于上必有寄夫封駁之責巡

察之權使其自大僚至于小吏一言一動皆得以摘舉自闕下至於遐陬一利一弊皆得以敷陳然後官無留慝民無隱情雖有鬼蜮之奸不崇朝而發露雖在要荒之外可計時而馳聞畏此簡書戢彼越志官清吏肅盜息民安此設立科道之本意也故許風聞言事雖有激聒而亦加優容蓋惟恐其畏縮不言故耳即所言未必皆當而要之勝于不言言不當則擇而行之者在上不言則上雖欲聞而無由祖宗所

以多其員數而及時選補者為此譬于人家若無體察巡視之人則工不即事盜且生心一帷之外耳目盡塞而奸慝叢至又使以數畝之宮而但責一二人巡視則顧東失西跋前躓後耳目依然蔽塞奸慝依然叢至如此而欲家之無壞不可得矣夫治家如此而況于國乎今科道差遣不敷常以一人兼數人之事此特有兼攝之名耳考其實職必有不舉舉亦不能如一人一事之精蓋朝廷以鹵莽苟且而寄官官亦

以鹵莽苟且而報事勢則然也無足恠者何則
以一人而兼數事其時其力不能委曲周詳必
將借耳目手足于官吏書役之流彼官吏書役
之流守法者少賣法者多合其衆人之奸智以
欺兼攝之一人雖勤如孔明嚴如包拯力必不
暇舉智必不暇察矣一日誤數事百日誤數百
事舉天下而論其兼愈多其誤愈衆於是庶頑
羣盜與此輩合而國與民俱受其害矣然則久
不考選是明奪科道之權而授之于此輩使得

以盜其權而行其私不知天下軍民受貪官污吏之害者何限貪官汙吏之大幸軍民之大不幸故臣前疏云以天下官吏言無不欲科道少而以天下軍民言無不欲科道多正謂此也知此利害甚大得失甚遠則知激聒之事特其不堪之小小者亦可以優容而不計矣伏望 皇上取其大益而忘其小不堪將吏部都察院疏早賜 俞旨但令其慎選端良勿以浮薄進則耳目廣神氣張而官吏之儆戒有資軍民之受

京西立
卷五

福無量矣
五月初
上

三

防虞揭帖

臣惟東征川兵近報不服發回四散東行恐其
流落作賊心常憂念昨見兵部叅押兵游擊王
之翰臣又不覺心動因而思之潛住都城窺探
鑽刺者恐不獨將官有之近日奏楊應龍過犯
之人皆係川兵川兵之潛住都城者必多矣又
復思之川兵土官多姓楊必應龍之族其兵必
應龍之兵則潛住京師者又不獨應龍之讐且
多應龍之黨矣夫應龍今方聽剿而此輩精健

矯捷登高踰險騰躍如飛流入畿輔又無紀律
作歹何難况海內民窮奸豪不少向以東征會
集今以事畢無歸指天畫地夜聚曉散今大工
正興軍匠喧雜儻此中有乘機混入或為細作
或肆狂圖驚動宸嚴大非穩便雖萬萬無他
而損威不小臣心懷憂疑不能帖席也伏乞
皇上慎重起居申嚴門禁令巡視皇城工程
等官比常倍加嚴謹仍申飭廠衛五城巡捕等
衙門將京城內外亦比常倍加嚴緝一面催趲

工程早完以肅穆清以安辰極抑臣有言臣見近日天下人心大不安靜流言煽惑睥睨竊發之事安保必無不獨一應龍之黨而兵部堂上見在止一本兵京營之中兵皆市徒官皆債帥無一足恃臣願皇上加意于此多選謀略文臣入為侍郎以備督撫不時之用多選忠勇武臣入補京營以備將帥不時之用而又明正賞罰大肅紀綱使人有所嚴畏遵守其嚴衛緝事乃國家緊要衙門官校人等別無恩澤止靠三

年類奏陞賞久吝不與無以為激勸之資并乞
率循舊規恩威並用使其鼓舞効力此未嘗有
費于朝廷而裨益者弘也書曰惟事事乃其有
備有備無患儻不以私憂過計為謀惟 皇上

採用或特賜批荅密傳兵部舉行

六月二十一日奉

諭朕覽卿奏具見忠愛懇切籌國嘉謨誠可嘉尚
大工建造謹慎門禁都着該管內外官員用心趨
造嚴加巡視關防兵部侍郎京營將官便着該部
遴推堪任的來簡用京城內外地方如有異言異

服無藉奸徒指稱文武官吏潛住結聚流傳煽惑
的廠衛城捕緝事衙門即便訪拏具奏其廠衛三
年類奏陞賞乃激勸恩典偶因提督管事陞遷未
定是以暫停着查照舊例舉行卿可還傳示各該
衙門知道特諭卿知

回防虞諭揭帖

題臣前日私憂過計因川兵四散疑其流入京師大工未完門禁難肅具揭仰祈慎重起居厚防意外奉

聖旨

云

欽此仰見

皇上聽納之度保泰之懷

不勝忻幸臣惟楊應龍乃豪奸劇賊足智多謀財富善能使人力强敢行稱亂今既罪彰見剿益將大肆狂圖神出鬼沒前者禁中累失門釘焉知非其竊去也古稱勇士一人雄入九軍如

荆軻曹沫要離豫讓之流史冊章章示人炯戒
是以天子出警入蹕清道而行所居之宮比于
上帝之清都薇垣之辰極人莫敢望安可窮年
累歲工作不休使丐兒乞徒游行無禁宸居
御寢歷歷可以指知寶閣珍臺昭昭在其目睹
守衛捍圉之士在于其外而流離瑣尾之輩乃
入其內譏察防禦不過數輩而操梃持錘乃至
千百啟釁召侮莫此為甚臣實為此惴懼也雖
有部伍然人衆而稽考難周雖有閤守然日久

而關防易懈如往有倒死在內而經宿始覺以
此推之能保無潛藏隱匿為叵測者乎與其過
于弛寧過于防宜上緊趲造嚴加關防遴選文
武將吏激勵嚴衛城捕 明旨既下臣當欽遵
傳示但臣此揭原為楊酋而起事關軍機宜加
秘密儻蒙特發一諭俾兵部遵行尤見 聖明
孜孜夙宵圖治至意

六月二十五日上

乞罷廣西貴州稅使揭帖

題臣惟礦稅二事天下皆以為不便而皇上
獨以為便亂端數見天下皆以為危而皇上
獨以為安豈皇上之心獨與天心通而能保
天下必無事乎臣愚殆不能曉也 聖意堅定
轉移未聞臣民日夜禱求庶幾少減而乃日甚
一日使人何所歸命至於廣西乃窮苦百粵之
地諸蠻巢穴控禦為難民無他業惟田是資徭
糧出沒徃徃病耕地促賦逋一切官俸軍需皆

仰給於廣東 先朝設置總督兼制兩廣意正

為此此地自給且不足而況可加一稅使乎四
萬之征從何而出尤不可之大者也昨日奉

旨又有貴州之差則滿朝臣子益驚怖而歎息

矣蓋貴州乃古羅施鬼國地皆蠻夷山多箐穴

水不涵濇土無貨殖通計民屯僅十四萬石為

天下第一貧瘠之處官戎歲給全仰於湖廣四

川二省蓋本非都會之地從古不入版圖我

朝但因雲南而自此借一綫之路以通往來一

綫之外悉皆夷峒鴟張豕突易動難安今云產
有水銀鉛銅硃砂堆黃白蠟等貨每年可徵稅
銀三萬五千兩名馬四十匹理所必無臣不敢
信縱使有之亦出蠻夷地方今蠻夷侵田奪貨
逞欲無厭撫之尚難豈可復擾彼稅使安能從
蠻夷征乎况楊應龍正肆猖獗朝廷方議征
討一新督撫鎮守等官而施為次第尚無可言
昨巡撫郭子章交代以書問臣內設四策一曰
戰二曰撫三曰先撫後戰四曰先戰後撫臣心

皆以為難不能對答蓋撫則損威辱國而此
酋又非撫之所能定前事覆轍已為可鑒臣故
難之戰則須兵一二十萬餉一二百萬假以便
宜寬之歲月而彼主我客彼守我攻難易懸殊
勝負莫料臣又難之臣思督撫鎮按等官正是
無米而炊徒手而搏千難萬難不堪展布之日
皇上宜為之夙宵軫念發餉處兵以鋤此酋梟
獍之心聯屬諸夷招採異類以削此酋羽翼之
助庶可近安楚蜀遠通滇南而還太平之舊觀

何為顧惜小利妨害大事又遣此一稅監耶臣
恐彼處久困水火望救之民將避益深益熟之
害奔迸林藪助賊為虐益難拊循益難攻計一
綫之路坐致淪沒而雲南亦將永斷矣關繫

國家安危豈小小而已哉且用兵之法弱當示
之以強饑當示之以飽貧當示之以富不足當
示之以有餘今天帑所儲原無不足司農出入
尚可拮据而必以窮乏二字遠播夷方兵戈之
場亦皆刮取楊酋若信朝廷窮乏則猖獗益

甚若不信 朝廷窮乏必謂方各兵費不能用
兵而其猖獗亦甚非所以昭廣大富實而警服
蠻夷反側之心也妨於安攘大計又非小小夫
各處礦稅臣每苦諫未即 賜允猶日庶幾至
於貴州則萬萬不可所宜亟收 成命誠欲奮
誅楊酋當示兵力之雄財力之富決不可虛示
貧弱為彼所侮既不惜兵餉大發將士則宜先
免此三萬五千以慰彼軍民之心權衡于輕重
緩急之間所蠲者甚少而所獲者甚多願毋以

反汗為難安危之幾在呼吸間也臣不勝懇竭

祈求之至

六月二十五日
上三十日奉

諭次輔朕昨覽卿奏揭忠君愛國遠慮深謀嘉尚不已且貴州稅課差官非專為貨財欲訪彼中軍民之利病起釁之由耳既卿這等說朕亦思念正在用兵征討之時勅諭留中未發已停竊矣況大臣義同休戚尤當仰體調停鎮靜何乃各衙門今又紛紛瀆擾其如國體何前遣內官張慶已不看了特諭卿知

回奏揭帖

題昨日文書官史賓捧出

聖諭云欽此臣盟手祇誦加額歡呼皇上從
善實不難于轉圜而臣等匡時未有工于納牖
言而當理無不允俞偶此遭逢何勝慶幸蓋貴
州合省八府不能及中原一大郡洪武初原未
開設三司後因雲南隔在天末非此無所借途
不得已而從百夷鬼國之中開一線置郵之地
其所需官軍俸糧皆資川湖協濟而本處莫能

供給仕宦之人皆不樂往諺云天無三日晴地無三里平人無三宿情此其涼瘠不堪反覆難定之狀可知矣况今楊酋跋扈憑陵五司巡撫江東之輕率寡謀深兵浪戰以致喪沒官民土軍至七八千人酋益猖狂四出而地方無兵與糧戶兵二部正難計處若加以權使一往民心必將動搖恐三萬五千之說未必得而雲貴二省之地可先失矣蓋地既不可時又不可取利甚微而貽害甚大又不可誠然眉之急事反掌

之禍機故臣未暇為各處危而亟為貴州危即在廷諸臣于各處有言有不言而于貴州無不言是皆出于忠君愛國之至誠也伏蒙 皇上洞悉政機深惟兵計念天討必加之地尤 廟謨宜謹之時特轉天心停差不遣昨奉 諭札即傳部科莫不欣欣喜色若獲天球衆心成城鼓舞若此楊酋小醜知不足滅矣

七月初一日上